

## CONVENIO DE COLABORACIÓN ENTRE A VICEPRESIDENCIA SEGUNDA E CONSELLERÍA DE PRESIDENCIA, XUSTIZA E DEPORTES E O ILUSTRE COLEXIO DE ABOGADOS DA CORUÑA, PARA O DESENVOLVEMENTO DO PROGRAMA EXPERIMENTAL DE MEDIACIÓN NO ÁMBITO PENAL NA CORUÑA EN 2022

Santiago de Compostela, na data da sinatura dixital

### REÚNENSE:

D. **Diego Calvo Pouso**, vicepresidente segundo e conselleiro de Presidencia, Xustiza e Deportes, actuando en nome e representación da Xunta de Galicia, en virtude do Decreto 60/2022, de 15 de maio, polo que se nomean os titulares das vicepresidencias e consellerías da Xunta de Galicia, no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa presidencia.

D. **Augusto José Pérez-Cepeda Vila**, decano do Ilustre Colexio de Avogados da Coruña, actuando en representación deste, de acordo co disposto no artigo 48 do Estatuto xeral da avogacía española.

Interveñen en función dos seus respectivos cargos e no exercicio das facultades que teñen conferidas para convir en nome das entidades que representan.

### EXPOÑEN:

**Primeiro.** As institucións participantes neste convenio teñen interese común na promoción e desenvolvemento da mediación como vía complementaria de solución de conflitos que pon ao alcance das partes implicadas novas ferramentas que lles permitan lograr solucións satisfactorias ás súas pretensións.

**Segundo.** Nos últimos anos asistimos á crecente importancia da mediación no escenario xurídico, na medida en que a través desta institución se persegue crear un espazo de diálogo guiado no que as partes poidan tratar o feito e as súas consecuencias, dado que a mediación é un mecanismo que busca respostas positivas ao conflito, forma parte dunha concepción máis humana da Xustiza e achega novas respostas á demanda social dunha Xustiza máis útil e próxima á cidadanía. Á diferenza da Xustiza clásica, a mediación outorga ás partes a posibilidade de xestionar a súa crise, sempre que concorran as condicións apropiadas, favorecendo que a expresión directa dos sentimentos e o intercambio sobre as causas do conflito intrapersonal e social permita, alén de estruturas formalizadas, a identificación de solucións máis equitativas, sobre todo porque a mediación humaniza o proceso e ponlles rostro ás partes.



**Terceiro.** A mediación é o sistema de xestión de conflitos en que unha parte neutral e imparcial, con carácter técnico e en posesión de coñecementos axeitados, independente dos actores institucionais do proceso penal, axuda a dúas ou máis persoas implicadas nun delito, en calidade de vítima e infractor, a comprender a orixe do conflito, as súas causas e consecuencias, a confrontar os seus puntos de vista e a elaborar acordos sobre o modo de reparación, tanto material coma simbólico.

**Cuarto.** A mediación penal non se debe configurar como unha xustiza negociada, senón que se debe inserir como un novo paradigma do Dereito Penal no que a vítima resulta revalorizada e se lle dá a oportunidade de que, se así o decide, participe activamente na solución do conflito penal; cómpre configurar a mediación penal como un instrumento de carácter social cualificado para a resolución de conflitos e que forma parte do moderno Dereito Penal do século XXI. A mediación no ámbito penal é unha das expresións posibles da xustiza restaurativa e a súa posta en marcha non exclúe a necesidade da Administración de xustiza, dado que o procedemento de mediación no ámbito penal constitúe un proxecto en construción que requirirá a creatividade e a comunicación entre os mediadores, xuíces, letrados da Administración de xustiza, fiscais e avogados, co obxectivo de perfeccionar o dito procedemento. Por esa razón, o proxecto debe concibirse como un acordo entre os distintos operadores xurídicos co obxectivo de que este procedemento sexa aberto e dinámico, xa que de común acordo os operadores poderán ir perfeccionándoo e corrixíndoo en tanto non exista unha lei reguladora da mediación penal, e sempre, é visto, con pleno respecto aos principios informadores do proceso penal cando nos atopemos ante unha mediación intraxudicial. A mediación penal adoita centrarse, substancialmente, nas infraccións con vítimas definidas, nas que a interacción entre vítima e vitimario está presidida pola simetría de forzas, o que permite garantir un espazo de liberdade recíproco.

**Quinto.** O contexto normativo e institucional que ampara este proceso de mediación debe situarse fundamentalmente no ámbito da Decisión marco 2001/220, do Consello da Unión Europea, relativa ao estatuto da vítima no proceso penal, en cuxo artigo 17 se establecía que os Estados membros terían que poñer en vigor as disposicións legais, regulamentarias e administrativas necesarias para dar cumprimento ao estipulado, e todo o máis tardar o día 22 de marzo de 2006. Esta normativa foi substituída con posterioridade pola Directiva, actualmente vixente, 2012/29 UE do Parlamento Europeo e do Consello, do 25 de outubro de 2012.

E precisamente con fundamento nesa normativa europea recentemente foi publicada a Lei 4/2015, do 27 de abril, do Estatuto da vítima do delito, normativa esta que veu a traspoñer a normativa comunitaria ao noso ordenamento xurídico interno. O artigo 15 da amentada lei establece que "as vítimas poderán acceder a servizos de xustiza restaurativa, nos termos que regulamentariamente se determinen, coa finalidade de obter unha adecuada reparación material e moral dos prexuízos derivados do delito", cando se cumpran os requisitos que se enumeran no dito precepto. O encaixe da mediación no proceso penal de adultos pódese localizar hoxe tanto nas diversas



posibilidades derivadas do instituto da conformidade coma en disposicións como a apreciación da atenuante de reparación do dano do artigo 21.5 do Código penal (en adiante CP), no grao que se determine atendidos o desenvolvemento do proceso e as demais circunstancias concorrentes, e co establecemento da pena a impoñer consonte as regras xerais establecidas no artigo 66 do CP.

**Sexto.** O presente convenio de colaboración en materia de mediación penal apóiase, pola súa vez, en experiencias similares que xa se están a desenvolver noutras comunidades autónomas e que sen dúbida achegarán no futuro, unha vez que se elabore un protocolo común, toda a información necesaria relativa a esta forma complementaria ao procedemento xudicial que presenta múltiples vantaxes, tanto polo protagonismo que adquire a vítima na resolución do conflito –posto que se configura como unha persoa capaz de comprender, e non xustificar, o feito delituoso mediante a escoita das motivacións do infractor nun contexto de calma emocional– coma polo feito de que se presenta á súa vez ao infractor como un individuo susceptible de mellora e responsabilidade.

**Sétimo.** As partes asinantes consideran esencial a colaboración na realización de accións tendentes a un mellor coñecemento da mediación como instrumento para a resolución de conflitos e á súa incorporación ao ámbito do proceso penal na Comunidade Autónoma de Galicia.

Por todo o exposto, as partes acordan asinar o presente convenio de colaboración con base nas seguintes

## CLÁUSULAS:

### **Primeira. Obxecto.**

O obxecto do presente convenio é establecer as condicións polas que se rexerá a colaboración entre a Vicepresidencia segunda e Consellería de Presidencia, Xustiza e Deportes, e o Ilustre Colexio de Avogados da Coruña, para o desenvolvemento do programa experimental de mediación no ámbito penal na Coruña en 2022.

Este convenio pretende ofrecer un procedemento de mediación nas distintas fases do proceso penal –instrución, axuizamento e execución–, de cara a que tanto a persoa que sufriu o delito coma a que é denunciada/investigada, ambas de xeito voluntario, e no marco do proceso penal, poidan participar activamente na resolución do conflito delituoso no que están implicadas, sempre coa intervención dunha persoa mediadora; persoa imparcial e axeitadamente formada, encargada de crear as condicións precisas para o diálogo entre vítima e infractor (noutras palabras, o mediador é unha peza clave, posto que é a persoa que facilita ese diálogo, pero que non resolve o conflito entre as partes).



A mediación reparadora concíbese, polo tanto, como unha fórmula complementaria ao procedemento xudicial e incardinada neste, que presenta os seguintes obxectivos específicos:

- a) Dotar de protagonismo a vítima na resolución e transformación do conflito que lle atinxe.
- b) Enriquecer o proceso resolutivo do conflito mediante a comunicación entre as partes e a introdución por elas de aspectos subxectivos que adoitan quedar á marxe do procedemento penal formal, conseguindo así unha maior profundidade na solución consensual respecto á mera sanción penal.
- c) Responsabilizar a persoa infractora do feito cometido e do dano ou prexuízo inflixido á vítima.
- d) Conseguir unha maior comprensión de todo o proceso para ambas as dúas partes.
- e) Resocializar o infractor.
- f) Intervir en conflitos xudiciais a través da mediación penal e da xustiza restaurativa como instrumento de resolución pacífica dos mesmos.

## **Segunda. Obrigas do beneficiario**

O Colexio de Avogados de Coruña comprométese a:

1. Realizar as actividades previstas no proxecto que se recolle no neste convenio. A dotación de persoal dedicada a estes fins estará sometida ás directrices do Colexio de Avogados de Coruña e o dito persoal non terá relación laboral coa Vicepresidencia segunda e Consellería de Presidencia, Xustiza e Deportes.
2. Destinar os fondos percibidos ao financiamento dos gastos necesarios para levar a cabo as actuacións referidas na cláusula primeira.
3. Achegar á Administración autonómica, cando lle sexa solicitada, información sobre as actividades realizadas.
4. Consentir expresamente a inclusión dos datos relevantes deste convenio nos rexistros públicos que proceda, de conformidade coa disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, dos orzamentos xerais da Comunidade Autónoma de Galicia para o ano 2006, e mais co artigo 16 da Lei 9/2007, do 13 de xuño, de subvencións de Galicia.
5. Dar axeitada publicidade ao carácter público do financiamento das actuacións obxecto do presente convenio, cumprir todas as condicións e obrigas recollidas nel e someterse ás actuacións de supervisión e control previstas no mesmo, así como observar as demais obrigas esixidas no artigo 11 da Lei 9/2007, do 13 de xuño.



6. Prestar a colaboración e facilitar tanta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma, Consello de Contas e ao Tribunal de Cuentas

7. Reintegrar, total ou parcialmente, a subvención percibida no suposto de incumprimento das condicións establecidas para a súa concesión.

**Terceira .Compromisos asumidos polas partes.**

- **Correspóndelle á Vicepresidencia segunda e Consellería de Presidencia, Xustiza e Deportes:**

A Vicepresidencia segunda e Consellería de Presidencia, Xustiza e Deportes comprométese a lle aboar ao Ilustre Colexio de Avogados da Coruña (Icacor, de aquí en diante) os gastos que deriven da execución por parte do Icacor deste programa de mediación no ámbito penal, coas seguintes tarifas:

- Aboaranse ata 30 euros por cada hora dos mediadores, ata un máximo de 180 euros por mediación realizada. No caso de que a mediación derivada polo órgano xudicial non se puidese iniciar (porque non fose aceptada por algunha das partes, porque non foi posible a súa localización, etc) aboarase unicamente 45 € como compensación. A estas cantidades engadiráselle o IVE que sexa de aplicación en cada caso.
- Para estes efectos, o Icacor, xunto coa documentación que achegue para a xustificación da execución do convenio, presentará tamén un informe detallado onde se recollan todas as mediacións realizadas, especificando o órgano xudicial, o procedemento, o nome do mediador que interveu na mediación, os beneficiarios e mais o número de horas de traballo que se xustifican (ata un máximo de 6 horas por mediación).
- Aboaranse ata 2.800 euros para gastos de mantemento do servizo de mediación e de divulgación.

O investimento máximo a que se refire o presente convenio fíxase en dez mil euros (10.000,00 €) para o ano 2022 con cargo á aplicación orzamentaria 05.22.131A.481.0 dos orzamentos do ano 2022 da Vicepresidencia segunda e Consellería de Presidencia, Xustiza e Deportes.

Poderá facerse un primeiro pagamento do 10% da contía total concedida con cargo aos fondos destinados ao mantemento do servizo e divulgación, en concepto de anticipo, unha vez asinado o convenio de colaboración.

O resto da contía total concedida, ata alcanzar o 80%, poderá facerse efectivo mediante pagamentos parciais á conta da liquidación definitiva, á medida que a entidade xustifique debidamente os gastos e os pagos realizados.

O 20% restante farase efectivo unha vez presentada pola entidade a documentación final xustificativa do gasto realizado.



A Vicepresidencia segunda e Consellería de Presidencia, Xustiza e Deportes faralle o pagamento ao ICACOR unha vez que este presente a seguinte documentación xustificativa:

- Certificación da Intervención ou do órgano que teña atribuídas as facultades de control da toma de razón de contabilidade e do cumprimento da finalidade para a que foi concedida a subvención, de acordo co establecido no artigo 28.5 da Lei 9/2007, do 13 de xuño, de subvencións de Galicia.
- Declaración do conxunto de axudas solicitadas –tanto das aprobadas ou concedidas coma das pendentes de resolución– para o mesmo proxecto ás administracións públicas competentes ou ás súas entidades vinculadas ou dependentes, así como aos entes privados.
- Declaración responsable de se achar ao corrente no cumprimento das obrigas tributarias e fronte á Seguridade Social, así como de non ter ningunha outra débeda coa Administración pública da Comunidade Autónoma.
- Calquera outra documentación ou material que o Icacor considere necesario presentar para unha mellor xustificación das actuacións obxecto do presente convenio.

O prazo límite para presentar a devandita documentación xustificativa fíxase no 30 de novembro de 2022.

Procederá o reintegro parcial ou total dos fondos percibidos no suposto de incumprimento das condicións establecidas para a súa concesión, nos termos previstos no título II da Lei 9/2007, do 13 de xuño, de subvencións de Galicia.

Así mesmo, ao abeiro do disposto no artigo 14.1.n) da Lei 9/2007, do 13 de xuño, de subvencións de Galicia, os criterios de gradación dos posibles incumprimentos para determinar a cantidade a minorar serán os seguintes:

- a) O incumprimento total dos fins para os que se concedeu a axuda, da realización dos gastos subvencionables ou da obriga de xustificación dará lugar á perda do dereito ao cobro ou, de ser o caso, ao reintegro da totalidade da axuda concedida.
- b) Calquera outro incumprimento parcial dos fins para os que se concedeu a axuda, da realización parcial do investimento subvencionable ou da obrigación de xustificación considerarase incumprimento parcial e dará lugar á perda do dereito ao cobro ou, de ser o caso, á perda do dereito ao cobro na porcentaxe correspondente ao investimento non efectuado ou non xustificable.
- c) A realización de modificacións non autorizadas no orzamento subvencionable suporá a perda do dereito ao cobro.



- ***Correspóndelle ao Icacor:***

O Icacor comprométese a implantar un programa piloto de mediación para o ámbito penal nos xulgados de instrución e do penal da cidade da Coruña e partidos limítrofes que decidan derivar cara á mediación, xa de oficio, xa por pedimento do Ministerio Fiscal ou de calquera das partes, de acordo coas indicacións dispostas no presente convenio.

Corresponderalle ao Icacor designar o lugar e o horario –para cuxo efecto se empregarán, agás negativa das partes, as instalacións do seu centro de mediación Icacor.MEDIA–, así como os mediadores que cumpran os requisitos previstos legalmente entre os que figuren inscritos nos seus respectivos rexistros. Para tal efecto, o colexio deberalle comunicar mensualmente ao xulgado aqueles mediadores que van conformar o equipo de mediación penal e que van estar dispoñibles durante ese mes, sempre respectando a permanencia dun mediador xurista supervisor do equipo.

**Cuarta. Gastos subvencionables.**

Con carácter xeral, e de acordo co establecido no artigo 29 da Lei 9/2007, do 13 de xuño, de subvencións de Galicia, consideraranse gastos subvencionables aqueles que de xeito indubidable respondan á natureza da actividade subvencionada e se realicen dentro do período comprendido entre o 1 de xaneiro de 2021

e a data límite de xustificación do convenio. En ningún caso o custo de adquisición dos gastos subvencionables poderá ser superior ao valor de mercado.

O financiamento por parte da Vicepresidencia segunda e Consellería de Presidencia, Xustiza e Deportes das actuacións obxecto do presente convenio será incompatible con outras axudas establecidas por outra Administración pública, organismo ou ente público ou privado, nacional ou internacional, para a mesma finalidade, de acordo co artigo 17.2 da Lei 9/2007, do 13 de xuño, de subvencións de Galicia, e co artigo 40.1.d) do Decreto 11/2009, do 8 de xaneiro, polo que se aproba o Regulamento da Lei 9/2007, de subvencións de Galicia.

Os custos indirectos formarán parte da xustificación da subvención, sempre que sexan imputados polo colexio á actividade subvencionada e en todo caso na medida en que tales custos correspondan ao período en que efectivamente se realiza a actividade, e con data de xustificación comprendida entre o 1 de xaneiro de 2022 e o 30 de novembro de 2022.

**Quinta. Control.**

O Icacor someterase ás actuacións de comprobación que a Vicepresidencia segunda e Consellería de Presidencia, Xustiza e Deportes lle poida requirir para a debida



xustificación dos fins deste convenio, así como tamén ás de control financeiro que lle corresponden á Intervención Xeral da Comunidade Autónoma en relación cos pagamentos realizados.

A Vicepresidencia segunda e Consellería de Presidencia, Xustiza e Deportes poderá solicitar en calquera momento os documentos que coide oportunos para a debida xustificación do gasto.

En todo caso, e unicamente para efectos estatísticos, o Icacor informará trimestralmente á Vicepresidencia segunda e Consellería de Presidencia, Xustiza e Deportes sobre os procedementos de mediación realizados polo equipo de mediación constituído, comunicando o número de mediacións realizadas, o xulgado de procedencia e a duración de cada unha delas, así como o resultado final dos procedementos.

O Icacor remitiralle á Vicepresidencia segunda e Consellería de Presidencia, Xustiza e Deportes unha memoria anual na que se recollan e describan todas as actuacións levadas a cabo polo equipo de mediadores.

#### ***Sexta. Compromisos dos profesionais que realicen a mediación.***

Os profesionais que realicen a mediación comprométense a:

- a) Realizar os cursos e seminarios de formación que para este efecto sexan convocados polo Icacor. Para estes efectos, os mediadores asignados a este convenio terán formación específica en mediación na xurisdición penal.
- b) Aceptar as encargas de mediación entre as partes, a non ser que incorran nalgún dos supostos de incompatibilidade recolleitos.
- c) Cumprir os prazos establecidos en relación coa duración máxima do procedemento de mediación.
- d) Respetar as disposicións existentes en materia de incompatibilidade.
- e) Garantir a debida confidencialidade e segredo na súa actuación como mediadores.
- f) Enviar con carácter semestral as fichas de datos solicitados polo Consello Xeral do Poder Xudicial

#### ***Sétima. Confidencialidade da información e dos resultados.***

As partes asinantes virán obrigadas en materia de protección de datos a cumprir co Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), e coas demais disposicións vixentes sobre a materia.



Non obstante, os partícipes no proceso mediador poderán cubrir de forma voluntaria unha enquisa sobre o grao de satisfacción do equipo de mediación.

Igualmente comprométese a observar o establecido na Lei 39/2015, do 1 de outubro, do procedemento administrativo común das administracións públicas, no que se refire ao acceso limitado aos propios interesados en relación cos documentos que conteñan datos referentes á intimidade das persoas.

Este convenio será obxecto de publicación, de acordo co previsto na Lei 1/2016, do 18 de xaneiro, de transparencia e bo goberno, da Administración pública galega. Así mesmo, incluírase no Rexistro Público de Axudas, Subvencións e Convenios, de conformidade co Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, e co artigo 16 da Lei 9/2007, do 13 de xuño, de subvencións de Galicia.

As partes asinantes do convenio manifiestan o seu consentimento para que os datos persoais que constan neste convenio, así como o resto das especificacións contidas nel, poidan ser publicados no Portal de transparencia e Goberno aberto.

Ademais, deberase cumprir coa obriga de subministro de información nos termos establecidos no artigo 4 da Lei 1/2016, do 18 de xaneiro, de transparencia e bo goberno e, de conformidade cos artigos 18 e 20.8 da Lei 38/2003, do 17 de novembro, xeral de subvencións, o instrumento de colaboración e a información sobre a subvención serán comunicados á Base de Datos Nacional de Subvencións (BDNS), que opera como sistema nacional de publicidade de subvencións.

#### **Oitava. Comisión de seguimento do convenio.**

Segundo o previsto na Lei 40/2015, do 1 de outubro, de réxime xurídico do sector público, créase unha comisión de seguimento, á que lle corresponde velar polo cumprimento do pactado e pola boa marcha do mesmo, sen prexuízo de que no seu seo se poida tratar de calquera outro asunto vinculado ao seu obxecto e relacionado coa mediación e a Administración de xustiza. As controversias sobre a interpretación e execución do presente convenio serán resoltas de mutuo acordo entre as partes no seo da comisión.

As controversias sobre a interpretación e execución do presente convenio serán resoltas de mutuo acordo entre as partes no seo da comisión.

Este órgano estará integrado polos seguintes membros:

- O titular da Dirección Xeral de Xustiza, que poderá delegar no subdirector xeral de Medios da Administración de Xustiza.
- O decano do Icacor, ou persoa en quen delegue.



Actuará como secretario, con voz pero sen voto, a persoa que exerza a xefatura do Servizo de Coordinación Técnico-Administrativa da Dirección Xeral de Xustiza.

A comisión reunirse de xeito ordinario cada tres meses co obxecto de garantir a calidade do servizo, corrixir disfuncionalidades e analizar a experiencia; e con carácter extraordinario cando sexa necesario, tras pedimento de calquera das partes. Para tales efectos a comisión poderá requirir a presenza do equipo mediador.

#### **Novena. *Vixencia do convenio.***

A vixencia do presente convenio será a comprendida entre a súa sinatura e o 31 de decembro de 2022. Non obstante, abranguerá as accións obxecto do convenio realizadas dende o primeiro de xaneiro de 2022.

#### **Décima. *Natureza xurídica.***

O presente convenio ten natureza administrativa e rexerese polas cláusulas establecidas nel, quedando fóra do ámbito de aplicación da Lei 9/2017, do 8 de novembro, de Contratos do Sector Público, con independencia de que, ao abeiro do previsto no artigo 4 de dita norma, lle sexan de aplicación os principios desta Lei para resolver as dúbidas e lagoas que se puidesen presentar.

Rexerese, así mesmo, pola Lei 9/2007, do 13 de xuño, de subvencións de Galicia, e mais polo Decreto 11/2009, do 8 de xaneiro, polo que se aproba o Regulamento da dita lei.

A Administración gozará de todas as prerrogativas inherentes á natureza administrativa do convenio.

A orde xurisdiccional contencioso-administrativa será a competente para resolver as cuestións litixiosas que se poidan suscitar entre as partes, conforme o establecido nos artigos 1 e 2 da Lei 29/1998, do 13 de xullo, reguladora da xurisdición contencioso-administrativa

#### **Décimo primeira. *Resolución do convenio.***

Será causa de resolución do presente convenio o incumprimento por unha das partes de calquera das obrigas contraídas e/ou cláusulas establecidas nel, así como o incumprimento da normativa vixente na materia, o que facultará outra parte para a resolución do mesmo, quedando automaticamente anulados todos os dereitos derivados, pero non así as obrigas inherentes, nin tampouco as actividades xa principiadas ao seu amparo, que continuarán ata a súa finalización.

#### **Décimo segunda. *Obriga de cumprimento dos compromisos.***



En caso de finalización do presente convenio, calquera que sexa a causa, as partes comprométense a concluír as obrigas e compromisos pendentes asumidos con anterioridade á data de finalización do mesmo.

**Décimo terceira. Cláusula final.**

A sinatura do presente convenio non é óbice para o establecemento ou ampliación de relacións de colaboración no ámbito da mediación con outras entidades ou institucións, nin exclúe a sinatura de calquera outro convenio de similar natureza.

E en proba de conformidade de canto antecede, e para a debida constancia, asínase o presente convenio de colaboración por cuadruplicado exemplar no lugar e data arriba indicados.

POLA VICEPRESIDENCIA SEGUNDA E  
CONSELLERÍA DE PRESIDENCIA, XUSTIZA E  
DEPORTES

POLO ILUSTRE COLEXIO DE AVOGADOS  
DA CORUÑA

Diego Calvo Pouso

Augusto José Pérez-Cepeda Vila

